

Яхшилик ерда қолмас!



14:00 / 08.06.2022 6021

Бир йили кечга яқын довон орқали водийга йўл олдим. Машинамиз Ангрендан чиқиб тоққа тирмашганида туйқус бузилиб қолди. Техникага унча тушунмайман, бошим қотди. Ҳаво совуқ, ҳаммаёқ яхмалак, боз устига мактабда ўқиидиган ўн ва ўн икки ёшли икки фарзандим ҳам ҳамроҳ. Битта-яримта ўтган машиналардаги ҳайдовчилар ёрдам бериш уёқда турсин, ҳатто тўхтагани қўрқишиади. Шунда тоғ йўлининг четидаги ёлғизгина уй эшиги очилиб, бир киши олдимизга келди. Салом-алиқдан сўнг уйига таклиф қилди. Болалар совқотиб кетгани учун дарров кўндиник.

Бояги киши йўл назоратчиси бўлиб ишларкан, тез дастурхон ёзди, иссиққина чойдан танимиз яйради. Шу ерда тунаб қолдик. Эртасига эрталаб таниш устасини чақириб, машинамизни тузаттириб ҳам берди. Кетар чоғи миннатдорчилик билдирам, у хижолат бўлиб кетди: «Э, ака, бу нима бўпти, ахир одамдан яхшилик қолади. Бугун мен сизга яхшилик қилсам, эртага бошқа бирордан икки ҳисса бўлиб қайтади. Гапимнинг исботи керак бўлса, икки йилча олдин бир наманганлик менга катта бир яхшилик қилганди. Отам нафақага чиқаётганларида уруш йиллари Наманганда ишлаган артелларидан маълумотнома олишга тўғри келди. Бегона шаҳарда тасодифан танишиб қолганим ўша киши мени уч кун

архивма-архив машинасида олиб юриб ишимни битириб берди, яна ҳар куни уйида меҳмон ҳам қилди. Ҳозир ўша қарзимни узганимдан ўзим хурсанд бўлиб кетдим».

Ислом дини ҳам, ахлоқимиз ҳам инсонларни фақат яхшилик қилишга, ёмонликлардан четда бўлишга буоради. Яхшилик энг аввало ота-онага, яқинларга, қўни-қўшниларга кўрсатилади. Яхшиликнинг катта-кичиғи бўлмайди. Бирор моли билан (бу саҳоватдир), бирор қўли билан, яна бошқаси чиройли сўзи билан яхшилик қиласди. Ҳатто бошқалар йўлидаги халақит бераётган шохчани олиб ташлаш ҳам яхшиликка киради.

Яхшилик қилишга шошилиш керак, чунки Пайғамбар алайҳиссаломнинг: «Кимга яхшилик қилиш эшиги очилса, фойдаланиб қолсин, зоро, унинг қачон ёпилишини билмайди»; «Ҳар бир яхшилик садақадир, дўстингга очиқ юз билан муомала қилишинг яхшилиқдир, унинг челягига ўз челягиндан сув қуийб беришинг ҳам яхшилиқдандир», деган насиҳатлари бор.

Яхшиликка чақирган киши ҳам шу ишни қилганга тенглаштирилади. «Ўзгаларга озор беришдан сақланиш яхшилик аломатларидан», дейишган улуғларимиз. Мұхаммад Зеҳний: «Одамларнинг энг яхшиси қалбидан яхшиликка йўл очган, ёмонлик ва очкўзликни қалбидан ҳайдаб чиқарган кишидир», деган. Нақлларда келишича, ким бирорнинг ғамини енгиллатса, охиратда унинг ғами енгиллаштирилади, қийинчиликда қолган бир кишига ёрдам қўлини чўзган киши ёрдамсиз қолмайди, ким бирорнинг айбини беркитса, унинг айби ҳам беркитилади.

Қўпларимиз яхшилик қиласизу дарров унинг мукофотини, биздан марҳамат кўрганларнинг миннатдорчиликларини кутамиз ёки яхшиликларимиз билан мақтанамиз. Аллома Умар ибн Ҳорис бундай деган: «Қадимда яхшиликларни кўп қилишарди, аммо гапиришмасди. Кейин ҳам қиласиган, ҳам гапирадиганлар келишди, энди эса фақат гапиришяпти». Қандайдир манфаат кутиб қилинган яхшилик фазилат санаалмайди.

Ваҳоланки, яхшилик холис Парвардигор учун, беғараз қилиниши керак. Буни тушунмаганлар яхшилик қилган кишиларидан ёмонлик кўришганига хафа бўлиб юришади. Эмишки, бир одам шогирдини ўғлидан ҳам аъло кўриб, бор ҳунарини ўргатиб одамлар қаторига қўшганида у устози юзига оёқ қўйиб кетибди. Ёки бошқасининг ҳасратига қулоқ солинг: «Жияним акамдан эрта етим қолди. Ўзим боқиб катта қилдим, ўқитдим, ҳунар ўргатдим, уйлаб-жойладим. Хотинчасининг сўзига кириб алоҳида яшайман,

деганида рози бўлиб, бошқа ҳовлига чиқардим. Энди ҳамма ерда «Дадамдан қолган пулни бермай ўзлаштириб юборди», деб гап тарқатиб юрганмиш. Инсон зоти ўзи яхшиликни билмайдиган ношукр бўлар экан».

«Савобнинг кети мушкулот» деган гап бекорга чиқмаган. Ҳақиқатан бирорга яхшилик қиласиз, аммо ундан жавоб қайтмайди, аксинча кўп ҳолларда яхшилигингиз эвазига ҳатто ёмонлик кўрасиз. Бирорга раҳм қилиб қарз берасиз, ололмай қийналасиз, ҳатто унга душманга айланасиз. Бирорга ёрдам қилиш учун битмаётган ишига елка қўйиб юборасиз, эвазига қуртдаккина «миннатдорчилик» эшитасиз. Бирор билан дўстлашмоқчи бўласиз, аммо у «бир балоси бўлмаса менга нега суйкалади», деб сизни душманига айлантиради. Қийналиб қолган укангизга пул таклиф қилсангиз, орқаваротдан «бойваччалигини бошқаларга қилсин» деган нордонгина гап эшитасиз. Бунга асло ажабланманг, чунки Аллоҳ таоло инсонларни шундай хулқ-атвор билан яратган. Шунинг учун ҳаётда кимга бўлишидан қатъи назар, одамларга яхшилик қилсангиз, мукофотини инсонлардан эмас, Яратганинг ўзидан кутинг. Одамлар камдан-кам яхшилигингизга яхшилик билан жавоб қайтаришади, миннатдор бўлишади.

Ўзгаларга яхшилик қилиш мўминнинг энг афзал хислатидир, Аллоҳ розилигини топишининг осон йўлидир. Яхшилик Аллоҳнинг бандага раҳматидир. Яхшилик қилганларни Аллоҳ таолонинг ўзи мукофотлайди. Унинг ваъдасига кўра яхшилик қилувчи мўминлар жаннат неъматлари дадирлар. Аллоҳ таоло айтади: **«Ва тақво қилганларга: Роббингиз нимани нозил қилди?» дейилди. Улар: «Яхшиликни, дедилар. Чиройли амаллар қилганлар учун бу дунёда чиройли** (мукофот) бордир. **Албатта, охират диёри яхшироқдир.**

Тақводорларнинг диёри нақадар яхши!» (Наҳл сураси, 30-оят).

Яхшиликнинг катта-кичиғи, ози-кўпи бўлмайди. Абу Зарр Фифорийдан ривоят қилинади: «Расулуллоҳ соллаллоҳу алайҳи ва саллам менга: «Яхшиликлардан бирортасини паст санамагин, агар у биродарингга очик юз билан қараш бўлса ҳам», деганлар (*Муслим ривояти*). Фахри коинот яна бундай марҳамат қилганлар: «Эй муслималар, бир аёл бошқасига қўйнинг туёғини беришдаги яхшиликни ҳам паст санамасин», деганлар (*Бухорий ва Муслим ривояти*). Яна бир ҳадиси шарифда «Ҳар бир яхшилик садақадир», дейилган (*Бухорий ривояти*).

Донишмандлардан бири айтади: «Яхшилик мол ва фарзандларнинг кўплигида эмас, яхшилик кенг феълли, ахлоқли бўлиш, илм олиш ва

Аллоҳга ибодатда бошқаларга ўрнак бўлишдир». Муҳаммад Зеҳний айтади: «Одамларнинг яхшироғи ўз қалбида яхшиликка йўл очгани ва ёмонликни, очкўзликни ҳайдаб чиқарганидир».

Яхшилик ва ҳилм дараҳтини эккан омонлик ва хотиржамлик мевасини териб олади. Ёвузлик уруғини сепган пушаймонлик-надомат ҳосилини ийғиб олади. Ҳақиқий комил инсон ёмон хислатлардан, номаъқул ва номарғуб хулқ-атвордан пок бўлади, гўзал сифат ва ахлоқ билан ўзини ораста қиласди, ёмонлардан четланади ва ҳеч кимга озор етказмайди. Ким қилган яхшилиги ёки амали билан мақтанса, унинг барча яхшиликлари ёмонликка айланади.

Ҳусайн Воиз Кошифий айтадики: «Гўзал феъл-атворнинг нишонаси ўнтадир ва буларнинг биринчиси бошқаларга яхшилик қилишдир». Яхшилик қилиш билан ҳеч нарса ютқазмайсиз. Саъдий Шерозий айтганидай, «Бир шам бошқа бир шамни ёққани билан нуридан ҳеч нарса камаймайди». Абдуллоҳ ибн Аббос бундай деганлар: «Яхшилик ҳақида ўйлаш ўша яхшиликни қилишга ундайди, ёмонликка надомат эса ўша ёмонликни тарк этишга чақиради».

Атоқли олим Ҳасан Басрийдан «Яхши инсон ким?» деб сўрашганида бундай жавоб берган: «Тўрт нарса кишининг яхши эканига даолат қиласди: тилининг ростгўйлиги, дўстларининг хато-камчиликларини кечириши, замона аҳлининг таниқли кишисига саҳоват кўрсатиши, таниш ва қўшниларга озор беришдан тийилиши». Келинглар, ҳар ерда, ҳар кишига, ҳамиша яхшилик қилишга шошилайлик. Яхшилик ва эзгулик ёмонликни ёқтиргмагани каби ёмонлик ҳам яхшиликдан қочади.

Аббос Турсунов

«Ҳилол» журналининг 2(23) сонидан